


Director di WEMA ta conta

COMPRA Y RENOVACION DI EDIFICIO BIEU DI VIANA TA ENCERA INVERSION DI CASI UN MIYON FLORIN



ORNAJESTAD(AAN): -- Riba e fotonan hunto cu e articulo, por mira e showroom bieu di Viana na San Nicolas.

Manera DIARIO a trece pa dilanti algun siman pasa, WEMA Home & Hardware Center a logra recientemente, pa compra e edificio aki for di Pensioenfonds di Aruba.

Esaki despues di mas cu

diez aña di negociacion.

Intencion di WEMA cu e edificio aki ta, pa converti'e den un espacio pa pacus.

Informe cu DIARIO ta dispone di dje ta indica cu lo bin lugar pa por lo menos, seis pacus.

E plannan ta muestra cu e lo bira un edificio bunita.

Cada pacus lo tin un oficina chikito y un baño, mientras cu mas patras, lo core un gang, caminda lo haya entre

otro, e airconan y e salidanan di emergencia.

E pacusnan lo ta traha di tal manera, cu nan lo por wordo haci mas grandi o mas chikito, dependiendo di e demandanan di esnan cu ta huur nan.

E dilanti di e edificio lo tin hopi glas, cu bentananan grandi y varios porta.

Seguridad lo ta halto, caminda cada pacus lo tin un

cortina di hero, cu lo por baha tur anochi pa cera e parti dilanti.

Lo tin alarma y e dak di e edificio lo ta cosí cu betonmat, loke lo dun'e extra seguridad contra ladron.

E trabaonan lo ta cla na juni venidero y ta encera -cu compra di e edificio- un inversion di casi un miyon Florin.

E renovacion di e edificio bieu di VIANA ta unicamente e prome parti di e proyecto total cu director di WEMA Karel Wever tin den pensamiento.

E di dos parti ta construcion di un oficina di dos piso, cu lo bin na lugar di e edificio ros cu tin banda di e anterior showroom di VIANA.

E oficina aki lo tin varios kantoor aden, cualnan lo wordo gehuur na companianan interesa.

Pa construye lo mester basha e edificio ros abao, loke lo tin cu socede den fase uno di e proyecto, esta, prome cu juni.

Patras di e oficina nobo, lo bin un parkinglot, caminda esun actual lo wordo amplia y embecece.

Riba 3 di mei venidero, WEMA Home & Hardwarestore ta cumpli 15 aña di existencia, director Wever ta conta DIARIO den un entrevista.

Den e 15 añaan cu a pasa, su compania a crece di 5 empleado pa 38 empleado den tres filial, na San Nicolas, Ponton y Santa Cruz.

Aunke cu en principio, lo tin espacio pa uno mas, señor Wever no ta mir'e ta habri un di cuatro WEMA.

Den e añanan venidero, e kier concentra riba cuatro punto: servicio, disponibilidad, prijsnan competitivo y control di gasto.

Pa Karel Wever, servicio ta encera cu e cliente ta bin na prome lugar.

Den e entrevista cu DIARIO, e ta bisa cu e ta laga su personal sigui diferente curso, pa forma nan pa duna bon servicio.

E cursonan aki ta bastante specializa y ta siña e empleado por ehempel, pa conoce e producto cu e ta bende.

Un empleado bon informa ta ofrece mihor conseho y conseho profesional na e cliente.

E suerte di WEMA ta, Wever ta kere, cu no tin cu duna cuenta na un doño den exterior, sea cu ta na Curacao o na Hulanda.

Doño di WEMA ta na Aruba mes, y ningun esfuerso ta necesario, pa e managernan y trahadornan di e tres filialnan yega na dje.

Segun señor Wever, WEMA ta traha cu vision, a cuminsa chikito y awor aki ya ta canando den pia di e gigantenan.

Cu otro palabra: WEMA t'ey pa keda!

Riba e fotonan hunto cu e articulo, un vista riba e edificio cu lo wordo renova y esun ros cu lo benta abao.